

*Sketch tiré du spectacle : « Les belles vacances de D'siré et Marylou »*

*(D'siré seul sur scène raconte cette mésaventure d'après-vacances. Il mime tous les personnages)*

*D'siré* : — In avot été in vacances dins l'sud-ouest et in avot eu bin du plaise... Et pis les meilleures choses ayant eun' fin, nous vlà arrivés au bout... El velle ed rentrer in avot vu à l'télé qu'les routes ed l'artour all' srotent classées rouches... Alors el lind'main in a démarré fort tumpé : à tros heures in saquot d'jà su l'démarrreur. I faijot brun mais y'avot d'l'orache ! El ciel i-étot zébré d'écrites sains arrêts ! Et zig ! Et zag ! Et zoug ! In s'sérot cru dins un viux film ed Zorro ! Et pis d'un caup d'un seul y'a eun' écriture qui nous a frôlés et qu'i-a atterri directemint dins not' boîte aux lettres huit-chint kilomètres pus lon : quatre-vingt dix euros, un point un moinsse ! Première surprise à pein.ne rentrés ! El deuxième in l'a vu deux mos pus lon ! J'allos partir ouvrir, j'avos m'musette su m'n'équenne et pis vlà qu'Marylou all' m'appelle du fin fond de l'salle de bains :

*Marylou* : — Viens un caup ichi ti, espèce d'abrandouille ! Aaaaaah bravo ! Pour de l'belle ouvrahe ch'est de l'belle ouvrahe ! Ém' vlà incore un caup deux mos in r'tard ! Aaaaaaah i-est biau l'roi d'l'arsaquette !

*D'siré au public* : — I faut chi ouvrir eun' parinthese pour définir el sins du mot 'Arsaquette'... Veyons... veyons vir cha dins l'dico 'Chti-Français'... *D'siré feuillète un dico imaginaire* : Alors vlà : Abache ét' maronne... ch'est pas cha... 'Aboule tes doubles'... non pus... 'Armonte tes bertelles'... pas cha non pus... Ah el vlà ! J'ai trouvé ! 'Arsaquette' ou 'Rassaquette' : deux mots pour el dire ! Ej lis : « Méthode contraceptive naturelle dite du retrait ! Latin 'Coïtus interruptus' ! » J'arferme el parinthese : cha fait courant d'air !

*Marylou* : — Ouais ! Déjà qu'in a eu six infants, ch'étot pas assez comme cha ? Un rapré-caup quinze ans après ! In puc t'as eun' babène touillée qu't'in est pas maîte, te vas aller bieffer cha à tous tes camarates, j'intinds déjà ch'habénache : « Z'avez vu Marylou ? All' a racaté ! »

*D'siré* : — Marylou, j'te l'jure : jé n'dirai rin à personne ! Rin ! Promis, juré, raqué !... Et m'vlà d'parti ouvrir... J'avos à peine tourné l'cuin de l'rue qu'in buque à l'uch ! Marylou all' va ouvère : ch'étot l'employé d'l'EDF qui passot pour relver ch'compteur.

— Bonjour madame, je viens faire le relevé de votre consommation électrique...

— Bon ben... rintrez... ch'compteur i-est dins l'colidor...

*D'siré au public* : — Et là, su sin cal'pin, l'agent d'l'EDF i vot qu'in n'a pas païé l'dernière facture !

*L'agent de l'EDF* : — Ah-Ah ! Je vois que madame est deux mois en r'tard !

*Marylou* : — Eeeeh quoi ! Commint qu'vous savez cha vous ? Cha vous argarde ? Quo qu'cha peut bien vous faire ? Foutez-moi l'camp espèce d'agosil ! Et Marylou all' l'a foutu à l'cour...

*D'siré au public* : — J'vous dis pas c'que j'ai intindu in rintrant à l'mason ! J'm'ai fait malotéééééé ! All' m'aurot dévoré ! All' m'a agoni d'tous ies noms, pire qu'du pichon pourri !

*Marylou* : — Ouais... t'allos rin dire à personne et l'premier yoyo qui dévale ichi ch'matin i l'savot d'jà !

*D'siré* : — Commint cha ? Mi j'ai rin dit à personne ! Qui qu'ch'est Marylou ?

*Marylou* : — Echti qui rélièfe chés compteurs : i-étot d'jà au courant !

*D'siré au public* : — Ch'est d'circonstance !



*D'siré à Marylou : — Attinds un caup, éj vas prinde ém n'après-midi et j'vas 'ller vir sin directeur... (Au public en aparté : In même temps j'vas in profiter pour aller chucher un canon à mon Zénobie !) Et m'vlà d'parti au bureau d'l'EDF...*

*D'siré à l'EDF : — Bojour m'sieur d'l'directeur ! Qui qu'ch'est ch'graind dépindeu d'indoulles qui rélièfe chés compteurs ? I-a 'té dire à m'feimme qu'all' étot deux mos in r'tard, quo qu'cha peut li faire ?*

*Le directeur : — Attendez... attendez... Vous êtes monsieur... ?*

*D'siré : — Mi ch'est Désiré... Désiré Cauffé...*

*Le directeur : — Voyons voir... voyons voir Mr Cauffé... Ah oui ! Effectivement ! Deux mois de retard !*

*D'siré surpris : — Ah... ah bon... ch'est... ch'est d'jà marqué ichi ?*

*Le directeur : — Eh oui monsieur, ici rien n'se perd !*

*D'siré : — Bon ben... euh... quo que j'dos faire ?*

*Le directeur : — Mais monsieur, c'est bien simple : il faut l'acquitter !*

*D'siré : — Hein ! La quitter ? Avec six infants ! El septième in route ! Cha ch'est pas possipe... j'peux pas... j'peux pas... j'peux pas... Et... et si j'la quitte pas ? Quo qui va s'passer ?*

*Le directeur : — Eh bien monsieur... on va vous l'couper !*

*D'siré, horrifié, la main devant sa braguette : — Quo ? In va me l'coper ! Aaaaah non alors ! In n'peut pas faire cha ! Aaaaah non-non-non-non-non ! Vous y pinsez pas ?*

*D'siré réfléchissant : — Et commint qu'in va faire après si qu'in me l'cope ?*

*Le directeur : — Eh bien monsieur... vous ferez comme tout le monde : vous vous servirez d'une bougie !*

*Glossaire : Du plaise : du plaisir Tumpe : tôt Brun : sombre D's éclites : des éclairs M'n'équenne : mon échine, mon dos Aboule tes doubes : donne-moi ton argent Abache ét' maronne : baisse ton pantalon Armonte tes bertelles : remonte tes bretelles Un rapré-caup : un 'après-coup' : un 'retour de flamme' ! Eun' babène touillée (avoir) : être trop volubile, rapporter Bieffer : baver Ch'babénache : le papotage All' a racaté : être de nouveau enceinte Raquer : cracher Buquer à l'uch : frapper à la porte L'colidor : le couloir Un agosil : un imbécile S'faire maloter, agonir : se faire engu... irlander Un yoyo : un idiot Un dépindeu d'indoulles : un demeuré Désiré Cauffé !! (Sic)*